

Headlines

1. उपराज्यपाल मनोज सिन्हा होरें आतंकवाद दे शकार लोके दे नेडमे सरबंधिएं गी ईद कोला पैहले तोहफे दे तौरा पर 50 नियुक्ति पत्र सौंपे।
2. केंद्री मंत्री रामदास अठावले होरें डॉ. फारूक अब्दुल्ला हुंदे पर जानलेवा हमले दी सख्त निंदेआ कीती ऐ। जम्मू-कश्मीर च केंद्र आसेआ विकास पैहलें गी उजागर कीता।
3. एशिया दा सबनें शा बड्डा इंदिरा गांधी मेमोरियल ट्यूलिप गार्डन कल्लै थमां आम लोके लेई खोली दिता जाहग, मुखमंत्रि उमर अब्दुल्ला होर एहदे रस्मी तौरा पर उद्घाटन करडन।
4. प्रधानमंत्री आवास योजना ग्रामीण तैहत जम्मू-कश्मीर नै 98 प्रतिश लक्ष्य हासल करदे होई 3 लख 23 जहार मकान बनाई लैते दे न।
5. जम्मू प्रांतै दे केई इलाके च अज्ज हल्के कोला दरम्याने दर्जे दी बरखा बरी, लोके सुक्की ठंड कोला राहत मसूस कीती।

<><><><><><>

LG-Appointment Letters

आतंकवाद पीड़ितें दे नेडमे रिश्तेदारें गी नियुक्ति पत्र सौंपने गी शरणस्थली जा फही सहारा करार दिंदे होई उपराज्यपाल मनोज सिन्हा होरें अज्ज आखेआ जे इस पहल दा मकसद आतंकवाद थमां प्रभावित परोआरें गी रोजगार दे मौके उपलब्ध करोआइयै अपना जीवन परतियै संवारने च मदाद करना ऐ। एल.जी होरें श्रीनगर लोकभवन आडिटोरियम च नियम-कायदें मताबक आतंकवाद कन्नै पीड़ित 50 परोआरें दे इक-इक जने गी नियुक्ति पत्र सौंपे। श्री सिन्हा होरें ईद दा सनेआ सांझा करदे होई इनें नियुक्ति पत्रें गी ईद दा खास तौहफा दस्सेआ। परोआरें दियें दुख-तकलीफें गी मनदे होई एल.जी होरें आखेआ जे ओहू उस पीड़ गी समझदे न जिसे पीड़ितें बड़ी दलेरी कन्नै सहन कीता ऐ। श्री सिन्हा होरें आखेआ

<><><><><><>

Athawale JK Devp.

केंद्री सामाजिक न्याय ते अधिकारिता राज्यमंत्री रामदास अठावले होरें साबका मुखमंत्रि डॉ. फारूक अब्दुल्ला हुंदे पर हाल च गै होए दे हमले दी सख्त निंदेआ कीती ऐ। जम्मू च इक प्रेस कांफ्रेंस गी संबोधित करदे होई अठावले होरें आखेआ जे इस चाल्ली दियां घटनां मेदे भागें आहिलियां न ते लोकतांत्रिक समाज च ऐसी घटना नेई होना लोडचदियां। श्री अठावले होरें इस गल्ला पर जोर पाया जे जम्मू-कश्मीर च अमन-रमानदारी ते आपसी भाईचारा बनाए रखे जाना लोडचदा ऐ ते हमले लेई जिम्मेदार लोके खलाफ सख्त कार्रवाई दी मंग कीती। केंद्री मंत्री होरें प्रधानमंत्री नरेंद्र मोदी हुंदी नुमायंदगी च केंद्र सरकार आसेआ जम्मू-कश्मीर च रम्भ कीती गेदियें नेके विकास पहलें पर बी लौऽ पाई। उनें आखेआ

<><><><><><>

Tulip-Garden Reopen

एशिया दा सबनें शा बड्डा इंदिरा गांधी मैमोरियल ट्यूलिप गार्डन कल्लै थमां लोके लेई खुल्ले आस्तै पूरी चाल्ली तैयार ऐ। मुखमंत्रि उमर अब्दुल्ला होर औपचारिक तौरा पर सैलानियें लेई इस बाग गी खोलडन। ट्यूलिप गार्डन दे परतिय खुल्लने पर अपनी खुशी प्रगट करदे होई उमर होरें अपने निजी एक्स अकाउंट पर आखेआ जे अज्ज उनेंगी श्रीनगर च ट्यूलिप गार्डन दी झलक दिक्खने दा मौका लब्बा। उनें आखेआ जे बाग बड्डा गै शानदार लगगा करदा ऐ। मुखमंत्रि होरें आखेआ जे बागवानें दी टीम नै मैहकमे दे अफसरें दी दिक्ख-रिक्ख च बेहतरिण कम्म कीता ऐ ते कन्नै गै आखेआ मौसम इकदम सेई ते रंग बडे गै खूबसूरत न। तोआई, बाग बारै जानकारी दिंदे होई बागवानी निदेशक कश्मीर माथूरा मासूम होरें आखेआ

<><><><><><>

Infiltration-Foiled

भारती सेना नै उड़ी सैक्टर च इक पाकिस्तानी आतंकवादी गी मारी मकां दे होई घुसपैठ दी इक कोशश गी नाकाम बनाई दित्ता ऐ। फौज दी चिनार कोर नै सोशल मीडिया मंच-एक्स पर दित्ती गेदी जानकारी च दस्सेआ ऐ जे 14 ते 15 मार्च दी दरम्यानी रातीं चलाए गेदे इक सांझे अभियान दरान सुरक्षाबलें बन्ने पर किश नक्लो-करत दिक्खी। मगरा ललकारे जाने पर आतंकवादी नै अन्नेबाह गोलिबारी शुरू करी दित्ती। सुरक्षाबलें दी कार्रवाई च इक पाकिस्तानी आतंकवादी मारेआ गेआ। टाक्करे आली थाहै थमां असलाह-बरूद बरामद कीता गेआ ऐ। तोआई, फौज दी उत्तरी कमान दे कमांडर लेफ्टिनेंट जनरल प्रतीक शर्मा होरें इक पाकिस्तानी आतंकवादी गी मारी मकाने ते घुसपैठ दी भैड़ी कोशश गी नाकाम बनाने लेई सौहगे बलें दी सराहना कीती ऐ।

<><><><><><>

Prog. Announcement

आकाशवाणी जम्मू दे क्षेत्रीय समाचार एकांश आसेआ कल 16 मार्च गी “राष्ट्री टीकाकरण दिवस-2026” दे मौके पर 25एं मिंटे दा इक विशेश कार्यक्रम प्रसारित कीता जाहग- जेहदा विशे होग “टीकाकरण जागरुकता राएं सार्वजनिक सेहत गी निगार बनाना”। इस विशेश कार्यक्रम दा प्रसारण दपैहरी 12 बजे कीता जाहग ते एहदे च सहाडे परौहने होडन- जम्मू-कश्मीर सरकारै दे सेहत विभाग दे राज्य टीकाकरण अधिकारी डॉक्टर शाहिद हुसैन- जेहडे इस चर्चा राएं अपने माहिराना बचार सांझे करडन। इस कार्यक्रम दी मेजबानी मेरे यानि विजय बजाज आसेया कीती जाहग।

<><><><><><>

JK-PMAY-G

अधिकारियें अज्ज जानकारी दिंदे होई दस्सेआ जे जम्मू-कश्मीर नै प्रधानमंत्री ग्रामीण आवास योजना ग्रामीण तैहत 3 लक्ख शा बद्द घरें दा निर्माण पूरा करी लैता ऐ जेदे कन्नै 97 प्रतिशत लक्ष्य हासल होई गेआ ऐ। ग्रामीण विकास ते पंचैती राज मैहकमे दे सैक्रेटरी मोहम्मद एजाज असद होरें इस योजना तैहत बाकी बचे दे 11,340 घरें दे निर्माण कम्में च तेजी आहनने दे निर्देश जारी कीते। प्रदेश च PMAY-G दी समीक्षा ताई सही गेदी इक बैठक दरान असद होरें आखेआ जे इस स्कीमै दा मजूदा गेड पूरा होने आहला ऐ ते मौजूदा गेड तैहत मंजूरशुदा सब्बै कम्म नाम गेड रम्भ होने शा पैहले विजन कुसै चिर दे पूरा कीते जाने लोडचदे। बैठक च दस्सेआ गेआ जे कुल 3 लक्ख 23 जहार 299 घरें दा निर्माण पूरा होई चुके दा ऐ।

<><><><><><>

Mughal-Road closed

ट्रैफिक पुलिस दे अफसरें अज्ज दपैहरी दस्सेआ जे पीर गी गली च होई दी ताजा बर्फबारी ते बरखा परैत ऐतिहासिक मुगल रोड गी हर चाल्ली दी गड्डियें लेई बंद करी दित्ता गेआ ऐ। एसएसपी ट्रैफिक रूरल जम्मू फारूक कैसर होरें आखेआ जे शिडकै गी खराब मोसम करियै एहतियाती गें दे तौरा पर बंद कीता गेआ ऐ। उनें आखेआ जे अगली सूचना तगर मुसाफिरें गी मुगल रोड पर सफर नेई करने दी सलाह दित्ती गेई ऐ। उनें आखेआ जे शिडकै दे ताजा हालात दी जानकारी उसलै दित्ती जाहग जिसलै इसी सुरक्षित घोशित करियै गड्डियें दी आओजाई लेई खोली दित्ता जाहग।

<><><><><><>

Weather

जम्मू खित्ते दे नेकां हिस्सें च अज्ज हल्की थमां दरम्याने दर्जे दी बरखा बरा करदी ऐ जिसी करियै मौजूदा सौके दे हालात थमां किश राहत थहोई ऐ। पच्छमी बहाएं च बनी दी नमीं खोदल करियै कल 16 मार्च तगर ते फही 18-20 मार्च बश्कार होर बरखा ते उप्परले इलाकें च बर्फबारी जारी रौहने दी मेद ऐ। करसानें गी सलाह दित्ती जंदी ऐ जे ओहू अपने कम्में-कारवाइयें गी रोकै देन ते यात्रुएं गी एहतियात बरतनी लोडचदी। मौसम केंद्र श्रीनगर नै अज्ज समूलचे जम्मू-कश्मीर च ते 20 मार्च तगर मौसम दे बदलोखडा रौहने दी पेशनगोई कीती ऐ। इस दरान प्रदेश दे नेकां हिस्सें च रूकी-रूकियै बरखा ते बर्फबारी होने दी मेद ऐ।

<><><><><><>

LPG-Poonch

जिला प्रशासन पुंछ नै मकामी बसनीके गी यकीन दोआया ऐ जे जिले च पेट्रोलियम उत्पादें एल.पी.जी ते अन्न-दाने सने सब्बै लोडचदियें चीजें-बस्तें दी कोई कमी नेई ऐ। पुंछ दे एडीसी ताहिर मुस्तफा मलिक होरें आखेआ जे जिला प्रशासन जरूरी चीजें-बस्तें दी दस्तेयाबी पर नेडमी तक्क रखा करदी ऐ। उनें दस्सेआ जे पुंछ दे डी.सी अशोक कुमार शर्मा होरें मकामी बजारें च हालात दा जायजा लैने ताई नेकां टीमां खडेरियां दियां न। इनें टीमें कल समूलचे जिले दे बक्ख-बक्ख बजारें दा दौरा लाया ते सेई कीता जे अन्नदाने, एल.पी.जी सिलेंडर ते पेट्रोलियम उत्पादें दा लोडचदा भंडार मौजूद ऐ। ए.डी.सी मलिक होरें इस सरबंधै च होर जानकारी दिंदे होई आखेआ

<><><><><><>

Sarazi Clutural Prog.

डोडा दे सराज इलाके दी समृद्ध सगोसार सांस्कृतिक विरासत ते परम्पराएं दे संरक्षण ते उनेंगी बढ़ावा देने दे मकसद कन्नै डोडा दे सामुदायिक हाल च इक सराजी सांस्कृतिक कार्यक्रम दा सरिस्ता कीता गेआ। एह कार्यक्रम जम्मू-कश्मीर कला संस्कृति दे भाषा अकादमी आसेआ आयोजित कीता गेआ जेह्दे च मकामी कलाकारें, लखारिएं ते संस्कृति प्रेमिएं बधी-चढियै हिस्सा लैता। कार्यक्रम दरान सराजी कलाकारें पारम्परिक गीत ते कवितां पेश कीतियां जिंदे च सराजी भाशा दी खूबसूरती ते गहराई दिक्खने गी लब्बी। इस बारै होर जानकारी दिंदे होई जम्मू-कश्मीर कला संस्कृति ते भाषा अकादमी दे डिप्टी सैक्रेटरी जोगिंद्र सिंह होरें दस्सेआ

<><><><><><>